

# **Z A K O N**

## **O ESTRADNOJ DJELATNOSTI**

### **I - OSNOVNE ODREDBE**

#### **Član 1.**

Ovim Zakonom uređuje se estradna djelatnost kao dio kulturnih i umjetničkih vrijednosti na području Hercegovačko-neretvanskog kantona (u daljnjem tekstu: Kanton), status i djelovanje estradnih izvođača, estradnih umjetnika i samostalnih estradnih umjetnika, poslovanje s privrednim društvima, ustanovama, udruženjima i drugim pravnim osobama, organizovanje i posredovanje u javnom izvođenju estradnih programa i druga pitanja od značenja za estradnu djelatnost.

#### **Član 2.**

Pod estradnom djelatnošću u smislu ovog Zakona podrazumijeva se pripremanje i javno izveđenje muzičkih, humorističkih, folklornih, artističkih, književnih, dramskih i drugih kulturno-umjetničkih i zabavnih programa s komercijalnom svrhom sticanja dobiti, odnosno zarade.

#### **Član 3.**

Estradna djelatnost se obavlja putem koncerata, priredbi, revija i drugih oblika estradnog predstavljanja u objektima namijenjenim za kulturne programe: dvoranama, turističkim, ugostiteljskim i sportskim objektima i u svim drugim pogodnim prostorima za obavljanje estradne djelatnosti kao što su: trgovi, parkovi, sportske dvorane i sl.

Estradnom djelatnošću zadovoljavaju se potrebe građana za kulturno-zabavnim i rekreacionim sadržajima i doprinosi raznovrsnosti oblika i sadržaja kulturnog života.

Estradna djelatnost se može obavljati samostalno u vidu zanimanja ili kao dopunska djelatnost.

### **II - UDRUŽENJE ESTRADNIH IZVOĐAČA KANTONA**

#### **Član 4.**

Udruženje estradnih izvođača se registruje kod Ministarstva pravosuđa, uprave i lokalne samouprave Kantona na način i po postupku utvrđenim zakonom kojim se uređuje udruživanje građana.

Udruženje se osniva radi afirmacije estradne umjetnosti i zaštite estradnih izvođača i umjetnika u Kantonu.

Udruženje ima statut kojim se uređuje naziv, sjedište, djelatnost i ostala pitanja značajna za rad udruženja.

### **III - POVJERAVANJE JAVNIH OVLAŠTENJA**

#### **Član 5.**

Udruženju u oblasti njegove djelatnosti povjerava se obavljanje javnih ovlaštenja, i to:

- priznavanje svojstva estradnog umjetnika (član 7. stav 4. ovog zakona i član 11.);
- vođenje evidencije estradnih umjetnika i izvođača (član 18.);
- davanje mišljenja i odobrenja (čl. 23., 25. i 26.);
- donošenje rješenja i izdavanje uvjerenja, potvrda i drugih isprava o činjenicama o kojima odlučuje ili vodi evidenciju (čl. 14. i 30.).

Organizacija, djelatnost, prava i obaveze Udruženja u vezi s povjerenim javnim ovlaštenjima uređuju se statutom i drugim aktima u skladu sa zakonom, kojim se uređuje kantonalna uprava.

Na odredbe svog Statuta Udruženje je obavezno pribaviti prethodnu saglasnost Ministarstva obrazovanja, nauke, kulture i sporta Kantona (u daljnjem tekstu: Ministarstvo).

### **IV - ESTRADNI IZVOĐAČI I UMJETNICI**

#### **Član 6.**

Javnim izvođenjem estradnih programa mogu se baviti osobe koje:

- imaju svojstvo estradnog izvođača po odredbama ovog Zakona;
- u skladu s odredbama ovog Zakona imaju priznato svojstvo estradnog umjetnika ili vrhunskog estradnog umjetnika;
- u skladu s odredbama ovog Zakona imaju priznato svojstvo samostalnog estradnog umjetnika;
- imaju priznato svojstvo samostalnog umjetnika u skladu s odredbama Zakona o samostalnim umjetnicima;
- imaju svojstvo pozorišnog umjetnika odnosno pozorišnog radnika u skladu sa zakonom kojim se uređuje pozorišna djelatnost.

Strana fizička osoba ili domaća fizička osoba s prebivalištem na području drugog kantona ili drugog entiteta koje se na području Kantona namjerava baviti estradnom djelatnošću, obavezno se treba prijaviti u Udruženje.

Uslove za podnošenje prijave iz stava 2. ovog člana utvrđuje Udruženje u svom Statutu.

## **Član 7.**

Estradni izvođač je osoba koja se bavi estradnom djelatnošću, u pravilu, kao dopunskim zanimanjem.

Estradni umjetnik je osoba koja sudjeluje u javnom izvođenju nekog od programa iz člana 2. ovog Zakona i kojoj je taj status priznat od strane Udruženja na osnovu bavljenja estradnom djelatnošću i priznanja koja je dobila za istaknuto djelovanje na estradi.

Estradnom umjetniku s više od 20 godina neprekinutog bavljenja estradnom djelatnošću ili koji je stekao značajna domaća i strana priznanja može se priznati status vrhunskog estradnog umjetnika.

Postupak i bliži kriteriji za priznavanje statusa estradnog umjetnika i vrhunskog estradnog umjetnika, kao i njihova prava određuju se posebnim aktom Udruženja.

## **Član 8.**

Osnovne obaveze estradnog izvođača odnosno estradnog umjetnika su:

- da se zalaže za kvalitet estradnih programa;
- da plaća članarinu Udruženju u skladu s općim aktom Udruženja;
- da redovno ispunjava i druge obaveze utvrđene posebnim zakonom: porezi, doprinosi i dr.;
- da u svojim javnim nastupima čuva ugled profesije kojom se bavi u skladu s kodeksom ponašanja koji propisuje matično udruženje;

Osnovne obaveze iz stava 1. obavezan je sadržaj članske iskaznice koju izdaje Udruženje.

Pored tih obaveza, statutom Udruženja mogu se utvrditi i druge obaveze estradnih izvođača, odnosno estradnih umjetnika.

## **Član 9.**

Domaći i strani estradni izvođač i estradni umjetnik mogu sudjelovati u javnom izvođenju estradnih programa, odnosno javno nastupati samo po osnovu ugovora s organizatorom ili posrednikom registrovanim za tu djelatnost (u daljnjem tekstu: posrednik).

Ukoliko dođe do spora na osnovu ugovora iz prethodnog stava, koji ugovorne strane ne mogu razriješiti sporazumno, mjerodavan je općinski sud.

## **V - SAMOSTALNI ESTRADNI UMJETNICI**

### **Član 10.**

Samostalni estradni umjetnik je osoba koja estradnu djelatnost obavlja samostalno u vidu zanimanja, a kome je taj status priznat od strane Udruženja.

Status samostalnog estradnog umjetnika Udruženje može priznati samo državljaninu Bosne i Hercegovine koji ima prebivališta na području Kantona.

#### **Član 11.**

Postupak priznavanja statusa samostalnog estradnog umjetnika uređuje se općim aktom Udruženja.

#### **Član 12.**

Zahtjev za priznavanje statusa samostalnog estradnog umjetnika zainteresirane osobe dužne su podnijeti Udruženju sa sljedećim priložima:

- biografijom podnosioca zahtjeva;
- uvjerenjem o državljanstvu;
- dokazom o stečenoj stručnoj spremi;
- dokazom o iskustvu u estradnoj umjetnosti i osvojenim priznanjima;
- potvrdom o prebivalištu na području Kantona.

#### **Član 13.**

Udruženje rješava podneseni zahtjev uzimajući u obzir:

- obrazovanje i osposobljenost kandidata za bavljenje estradnom djelatnošću;
- nagrade i priznanja koja je kandidat dobio za svoje estradno djelovanje u zemlji i u inozemstvu;
- razdoblje estradnog djelovanja.

Bliže kriterije za priznavanje statusa samostalnog estradnog umjetnika utvrđuje Udruženje.

#### **Član 14.**

Status samostalnog estradnog umjetnika Udruženje priznaje svojim rješenjem.

Protiv rješenja Udruženja može se izjaviti žalba drugostepenom tijelu Udruženja, koje je dužno ovu žalbu riješiti u roku od 30 dana od njegovog prijema.

#### **Član 15.**

Samostalni estradni umjetnik osigurava sredstva za doprinose za svoje penziono i invalidsko osiguranje te zdravstvenu zaštitu.

Ova sredstva za samostalnog estradnog umjetnika može osigurati i pravna osoba s kojim sklopi ugovor o saradnji.

## **Član 16.**

Status samostalnog estradnog umjetnika prestaje u sljedećim slučajevima:

- ako samostalni estradni umjetnik ne ispunjava obaveze iz člana 8. stava 2. i 3. ovog Zakona u trajanju dužem od tri mjeseca;
- ako zasnuje radni odnos na neodređeno vrijeme;
- ako se duže od tri godine ne bavi estradnom djelatnošću;
- ako više nema prebivalište na području Kantona;
- ako samostalnom estradnom umjetniku bude izrečena mjera sigurnosti zabrane vršenja poziva, djelatnosti ili dužnosti;
- ako bude upućen na izdržavanje kazne zatvora u dužem trajanju od šest mjeseci.

Udruženje iz člana 10. stava 1. Zakona, rješenjem utvrđuje postojanje odgovarajućih činjenica i prestanak statusa samostalnog estradnog umjetnika.

Protiv rješenja iz prethodnog stava žalba se može izjaviti Ministarstvu u roku od 30 dana od dana njegovog prijema.

## **Član 17.**

Prava i obaveze samostalnog estradnog umjetnika miruju za vrijeme:

- odsluženja vojnog roka;
- pritvora odnosno izdržavanja kazne zatvora do šest mjeseci;
- trajanja kaznenog ili prekršajnog postupka koji ga čini nedostojnim bavljenja estradnom djelatnošću.

## **Član 18.**

Evidencija samostalnih estradnih umjetnika vodi se u Udruženju.

Samostalnog estradnog umjetnika Udruženje upisuje u evidenciju samostalnih estradnih umjetnika i izdaje mu člansku iskaznicu.

Udruženje uređuje posebnim općim aktom vođenje evidencije samostalnih estradnih umjetnika i sadržaj članske iskaznice u skladu s odredbama ovog Zakona.

## **VI - POSLOVANJE ESTRADNIH IZVOĐAČA I UMJETNIKA**

### **Član 19.**

Estradni izvođači i estradni umjetnici mogu poslovati s privrednim društvima, ustanovama, udruženjima i drugim pravnim osobama, kao i samostalnim privrednicima na tržišnim osnovama.

Ovo poslovanje reguliše se ugovorom o angažmanu ili posredovanju, koji sadrži osobito:

- sudionike u poslovanju;
- predmet poslovanja;
- vrijednost poslovanja;
- međusobna prava i obaveze;
- način ostvarivanja moralnih i materijalnih autorskih prava u skladu s posebnim zakonom.

## **VII – ORGANIZOVANJE I POSREDOVANJE**

### **U JAVNOM IZVOĐENJU ESTRADNIH PROGRAMA**

#### **Član 20.**

Organizovanjem javnog izvođenja estradnih programa može se baviti privredno društvo, ustanova, udruženje ili samostalni privrednik, registrovani za organizovanje estradnih programa i nastupa (u daljem tekstu: organizator).

#### **Član 21.**

Posredovanje u javnom izvođenju estradnih programa je dovođenje u vezu estradnih izvođača odnosno umjetnika s organizatorima estradnih priredbi i nastupa.

U slučajevima iz prethodnog stava obavezno se zaključuje ugovor između posrednika i estradnog izvođača, odnosno umjetnika o posredovanju.

#### **Član 22.**

Posredovanjem se može baviti privredno društvo, ustanova, udruženje ili samostalni privrednik, registrovani za obavljanje te djelatnosti.

#### **Član 23.**

Iznimno organizovanjem javnih estradnih programa odnosno posredovanjem u javnom izvođenju estradnih programa može se baviti i humanitarna organizacija, ustanova, udruženje ili druga pravna osoba ako je to od interesa za ostvarivanje njegove društvene funkcije.

U slučaju iz prethodnog stava organizator, odnosno posrednik dužan je pribaviti odobrenje Udruženja koja pokriva tu oblast.

#### **Član 24.**

Protiv rješenja Udruženja kojim se odbija zahtjev za izdavanje odobrenja iz prethodnog člana ovog zakona, dopuštena je žalba Ministarstvu u roku od osam dana od dana njegovog prijema.

Ministarstvo rješava po žalbi u skladu sa zakonom kojim se uređuje upravni postupak.

## **Član 25.**

Organizovanjem javnog izvođenja estradnih programa odnosno posredovanjem u izvođenju estradnih programa u inozemstvu ili s inozemnim estradnim izvođačima, odnosno umjetnicima na području Kantona može se baviti samo organizator i posrednik koji je registrovan za obavljanje ove djelatnosti s elementom inozemnosti uz obavezno pribavljeno mišljenje Udruženja koje prethodi izdavanju radne dozvole za zaključivanje ugovora o obavljanju privremenih i povremenih poslova u skladu s propisima kojim se reguliše zapošljavanje stranaca.

Ukoliko organizator ili posrednik prethodno ne pribavi mišljenje Udruženja ili ne dobije pozitivno mišljenje, Udruženje je ovlašteno podnijeti zahtjev Ministarstvu unutrašnjih poslova - mjerodavnoj policijskoj upravi radi zabrane održavanja estradnog programa, odnosno nastupa.

## **Član 26.**

Međunarodna kulturna saradnja u vezi s vršenjem estradne djelatnosti je slobodna, s tim da je organizator obavezan pribaviti mišljenje Udruženja, kao i sva potrebna odobrenja i saglasnosti u vezi s boravkom i radom stranih estradnih izvođača, odnosno estradnih umjetnika u skladu s odredbama ovog i drugih zakona i propisa.

## **Član 27.**

U pogledu uslova za osnivanje organizatora iz člana 20. i posrednika u izvođenju javnih estradnih programa iz člana 22. ovog Zakona primjenjuju se odgovarajući zakoni kojima se reguliše rad privrednih društava, humanitarnih organizacija, drugih organizacija, ustanova, udruženja i drugih pravnih osoba.

## **Član 28.**

Organizator je odgovoran za javno izvođenje estradnog programa u skladu s odredbama zakona kojima se uređuju javno okupljanje i javni red i mir.

## **Član 29.**

Svako oglašavanje javnog estradnog programa, pored oznake sudionika programa, obavezno sadrži naziv, odnosno ime organizatora tog programa.

## **Član 30.**

Kontrola provođenja odredaba ovog zakona u vezi s pribavljanjem potrebnih mišljenja, saglasnosti, odobrenjima i dozvolama, povjerava se Udruženju.

Udruženje je ovlašteno u slučaju kršenja odredaba ovog Zakona podnijeti prijavu o počinjenom prekršaju sudu za prekršaje.

Udruženje najmanje jednom godišnje podnosi izvještaj Ministarstvu o svom poslovanju.

## **VIII - NADZOR**

## **Član 31.**

Nadzor nad provođenjem ovog Zakona i zakonitošću rada Udruženja u skladu s odredbama ovog Zakona vrši Ministarstvo.

## **IX - KAZNENE ODREDBE**

### **Član 32.**

Novčanom kaznom od 1.000,00 do 10.000,00 KM kaznit će se za prekršaj organizator odnosno posrednik:

1. ako ne pribavi odobrenje Udruženja iz člana 23. stava 2. ovog Zakona;
2. ako organizuje javno izvođenje estradnog programa u inozemstvu, odnosno s inozemnim estradnim umjetnikom na području Kantona ili ako posreduje suprotno članu 25. ovog Zakona.
  - Za prekršaj iz prethodnog stava ovog člana kaznit će se i odgovorna osoba u organizatoru ili posredniku novčanom kaznom od 200,00 do 2.000,00 KM.
3. ako za javno izvođenje estradnog programa angažuje osobu za koju nisu osigurani mišljenje i odobrenje iz člana 26. ovog Zakona.
  - Za prekršaj iz prethodnog stava ovog člana kaznit će se i odgovorna osoba u organizatoru ili posredniku, novčanom kaznom od 200,00 do 2.000,00 KM.
4. ako za javno izvođenje estradnog programa angažuje osobu za koju nisu osigurani mišljenje i odobrenje iz člana 26. ovog zakona.
  - Za prekršaj iz prethodnog stava ovog člana kaznit će se i odgovorna osoba organizatora, novčanom kaznom od 200,00 do 2.000,00 KM.
5. ako prilikom javnog oglašavanja estradnog programa ne navede sadržaj iz člana 29. ovog Zakona.

Za prekršaj iz prethodnog stava ovog člana kaznit će se i odgovorna osoba organizatora, novčanom kaznom od 200,00 do 2.000,00 KM.

### **Član 33.**

Novčanom kaznom od 200,00 do 1.000,00 KM kaznit će se za prekršaj fizička osoba, odnosno estradni izvođač ili estradni umjetnik ako:

- sudjeluje u javnom izvođenju estradnog programa na području Županije suprotno odredbama članka 6. ovog Zakona;
- sudjeluje u javnom izvođenju estradnih programa suprotno odredbama članka 9. ovog Zakona.

### **Član 34.**

Za utvrđeni prekršaj odredaba ovog zakona pored novčane kazne obavezno se rješenjem oduzima imovinska korist pribavljena izvršenjem prekršaja u skladu sa Zakonom o prekršajima, a po postupku i na način utvrđen Zakonom o prekršajima mogu se izreći i sljedeće zaštitne mjere:

- zabrana obavljanja samostalne djelatnosti;
- udaljavanje stranaca s teritorije Kantona.



## **X - PRIJELAZNE I ZAVRŠNE ODREDBE**

### **Član 35.**

Organizatori i posrednici konstituisani prije stupanja na snagu ovog Zakona dužni su uskladiti svoju organizaciju i djelatnost s odredbama ovog Zakona u roku od šest mjeseci od dana njegovog stupanja na snagu.

### **Član 36.**

Udruženja estradnih izvođača dužna su uskladiti svoje organizacije u skladu s odredbama člana 5. stava 2. i donijeti akte iz člana 5. stav 2., člana 7. stav 4., člana 8. stav 1. alineja 4. i člana 11. ovog Zakona u roku od šest mjeseci od dana njegovog stupanja na snagu.

### **Član 37.**

Do priznavanja statusa estradnog umjetnika po odredbama ovog Zakona osoba koje se bavi estradnom umjetnošću ima status estradnog izvođača.

Iznimno od odredaba člana 7. stava 2. ovog Zakona, estradnim umjetnicima, odnosno vrhunskim estradnim umjetnicima smatraju se osobe zatečene u svojstvu estradnog radnika po odredbama Zakona o estradnoj djelatnosti ("Službeni list SR BiH", br. 25/84, 5/88, 20/90 i "Službeni list R BiH", br. 3/93 i 13/94).

Osobe iz stava 2. ovog člana dužne su u roku od šest mjeseci od dana donošenja akata iz prethodnog člana prijaviti se Udruženju radi upisa u evidenciju.

### **Član 38.**

Danom stupanja na snagu ovog Zakona na području Kantona prestaje primjena Zakona o estradnoj djelatnosti ("Službeni list SR BiH", br. 25/84, 5/88, 20/90 i "Službeni list R BiH", br. 3/93 i 13/94).

### **Član 39.**

Ovaj zakon stupa na snagu osmog dana od dana objavljivanja u "Službenim novinama Hercegovačko-neretvanskog kantona".

**Bosna i Hercegovina  
Federacija Bosne i Hercegovine  
Hercegovačko-neretvanski kanton  
S K U P Š T I N A**

**Broj: 02-01-X-088/04  
Mostar, 24. maj 2004. godine**

**Predsjedavajući  
Omer Čevra, s.r.**

